

Carte blanche RTL radio 27. März 2017

Michel Maquil, President vun InFiNe.lu

Version luxembourgeoise

Déi rezent Flüchtlingskris huet eng grouss Veronsécherung an der europäescher Gesellschaft mat sech bruecht. Och wann et gelongen ass d'Zuel vun den Flüchtlingen, déi an eis Länner kommen, staark ze reduzéieren, dann ass domatter de Problem, besonnesch am Noen Osten, nach laang net geléist.

Niewent dem Noen Osten mussen mir och d'Situatioun a ganz Afrika intensiv observéieren. D'Bevëlkerung vun deem Kontinent wäert sech an de nächsten 30 Joer vun 1,2 Milliarde, praktesch verduebelen op wäit iwwer 2 Milliarde Mënschen, wat gewaltig Rausfuerderunge fir déi Länner an Afrika mat sech bréngt.

Dowéinst kommen all Joer Milliounen jonk Leit nei op den Arbeitsmaart. Leider ass an deene Länner de Wirtschaftswuesstem vill ze schwach fir esou ville Jonken eng Aarbechtsplaz unzebidden. Esou missten eleng an Afrika all Joer ronn 18 Milliounen nei Aarbechtsplaze geschaf ginn fir där Nofro eenegermoosse gerecht ze ginn. Laut enger internationaler Beroder Firma sinn awer, an de lëschte 5 Joer, héichsten 4,1 Milliounen Aarbechtsplazen pro Joer geschaf ginn.

Wann elo an deem Kontinent Milliounen jonk Leit guer keng Aussicht op Aarbecht hunn, da bréngt dat noutgedronge mënschlech Katastofe mat sech, wéi Hongersnout, Epidemien, Gewalt a Krich. Dann ass d'Gefor ganz grouss datt vill Leit sech op de Wee fir Europa maachen an der Hoffnung do eng besser Zukunft kënnen opzebauen.

Wou sollte se och soss higoen?

Wann Europa eng massiv Flüchtlingswell aus Afrika wëll vermeiden, da muss dringend eng ganz zilgerecht a koordinéiert Aktioun an deem Kontinent ënnerholl ginn, wou am weesentlechen 3 Axe dra mussen sinn.

Fir d'éischt muss alles gemaach gi fir d'Korruptioun an deene Länner efficace a ganz energiesch ze bekämpfen. Esou kéinten déi wéineg Budgetmëttelen, déi déi Länner hunn, verstärkt zum Notzen vun deene Bierger agesat ginn, déi se am meeschte brauchen. Hei ka ganz vill erreecht ginn, zum Beispill, duerch eng verstärkten Transparenz vun de Finanztransaktiounen.

Da muss och virun allem d'Bildung an d'Ausbildung, vun der breeder Bevëlkerung, eng absolut Prioritéit an der Ëntwécklungspolitik kréien. Dëst ass op alle Niveaue néideg a muss esou Wuel als Zilgruppen, d'Kanner, d'Jugendlech an déi Erwuessen erreechen fir esou de Bildungsniveau vun der gesamter Bevëlkerung ropzesetzen. D'Beispill vun Asien huet esou bewisen datt wann de Bildungsniveau vun allen Awunner eropgeet, déi demografesch Entwécklung automatesch zréckgeet.

Schlussendlech misste weider Ustrengeunge gemaach gi fir datt de Wirtschaftswuesstem an déi demografesch Entwécklung géigesäiteg an Aklang bruecht ginn.

D'Länner aus der Europäescher Unioun missten hier national Politik matenee koordonnéieren a se dese gewalteen Erausforderungen upassen. Eng couragéiert a koherent gemeinsam Entwécklungspolitik ass hei ubruecht.

Iwwregens ass Europa, duerch seng geografesch Positioun, a seng Aktioun an deem Kontinent, déi Regioun déi laangfristeg am meeschte vun engem Opschwonk an Afrika profitéiere géif.

Hoffentlech gött hei gehandelt ier et ze spéit ass.